

AKT NORMATIV
Nr.5, datë 12.3.2022

**PËR DISA SHITESA NË LIGJIN NR.8450, DATË 24.2.1999, “PËR PËRPUNIMIN,
TRANSPORTIMIN DHE TREGTIMIN E NAFTËS, TË GAZIT DHE
NËNPRODUKTEVE TË TYRE”, TË NDRYSHUAR**

Në mbështetje të nenit 101 të Kushtetutës, me propozimin e ministrit të Infrastrukturës dhe Energjisë dhe të ministrit të Financave dhe Ekonomisë, Këshilli i Ministrave

VENDOSI:

Neni 1

Në ligjin nr.8450, datë 24.2.1999, të ndryshuar, pas kreut III shtohet kreu III/1, me këtë përmbajtje:

“KREU III/1
SITUATA E VEÇANTË DHE MASAT PËRKATËSE

Neni 21/1

Situata e veçanta

1. Situatë e veçantë, në kuptim të këtij kreu, janë të gjitha ato situata të cilat krijojnë situatë emergjente kur tregu hidrokarbur karakterizohet nga:

a) reduktimi i përshpejtuar deri në mungesë i furnizimit me naftë, gaz dhe nënprodukte të tyre;

b) rritja e ndjeshme e çmimit të tyre në treg;

c) zvogëlimi në mënyrë të ndjeshme i importeve mesatare të naftës/gazit dhe nënprodukteve të tij, në krahasim me importet mesatare mujore të vitit kalendarik pararendës, për shkak të mungesave në tregun ndërkombëtar;

ç) zvogëlimi në mënyrë të argumentuar në një shkallë të tillë që pasojat e pafavorshme të shkaktuara nga kjo situatë nuk mund të shmangen a të parandalohen pa përcaktimin e masave në përputhje me këtë kre;

d) çdo situatë tjetër e krijuar në tregun ndërkombëtar, e cila ka sjellë deformime në tregun vendas.

2. Situatë e veçantë shpallet me vendim të Këshillit të Ministrave.

Neni 21/2

Bordi

1. Në rastin e situatave të veçanta ngrihet dhe funksionon Bordi i Transparencës dhe Kufizimit të Përkohshëm të Çmimeve të Tregtimit me Shumicë/Pakicë të Nënprodukteve të Naftës dhe Gazit (në vijim Bordi).

2. Bordi ka në përbërje:

a) ministrin përgjegjës për ekonominë, në cilësinë e kryetarit;

b) ministrin përgjegjës për hidrokarburet;

c) Drejtorin e Përgjithshëm të Tatimeve;

ç) Drejtorin e Përgjithshëm të Doganave;

d) 5 përfaqësues nga shoqëritë e hidrokarbureve, ndër të cilët 3 përfaqësues nga shoqëritë e tregtimit me shumicë dhe 2 përfaqësues të tregtimit me pakicë të hidrokarbureve;

dh) 2 përfaqësues nga ministria përgjegjëse për hidrokarburet, në nivel drejtuesi;

e) 1 përfaqësues nga ministria përgjegjëse për financat, në nivel drejtuesi të lartë.

3. Bordi mund të ftojë të marrin pjesë në mbledhjet e tij edhe përfaqësues të tjerë nga institucione shtetërore, ekspertë të fushës apo grupe interesi.

4. Bordi merr vendime me shumicë të thjeshtë të të gjithë anëtarëve të tij. Në rastet e konfliktit të interesit të përfaqësuesve të shoqërive hidrokarbure, ndaj të cilave merret masë administrative, përfaqësuesi merr pjesë pa të drejtë vote në mbledhjen e Bordit dhe përjashtohet nga vendimmarrja.

5. Sekretariati i Bordit të përcaktuar në këtë kre do të jetë Drejtoria e Përgjithshme e Politikave Fiskale, në Ministrinë e Financave dhe Ekonomisë.

6. Pesë shoqëritë hidrokarbure, të cilat kanë xhiron vjetore më të lartë në vitin paraardhës, dërgojnë emrin e përfaqësuesit të tyre te Sekretariati i Bordit. Mbledhjet e Bordit thirren me kërkesë të ministrit përgjegjës për hidrokarburet dhe/ose ministrit përgjegjës për ekonominë. Njoftimi për mbledhje duhet të kryhet të paktën 2 (dy) orë para mbledhjes.

Neni 21/3

Kompetencat dhe përgjegjësitë e Bordit

Bordi ka këto kompetenca dhe përgjegjësi:

a) Të zbatojë metodologjinë e përcaktuar në këtë kre për përcaktimin në transparencë të plotë të çmimit tavan, duke marrë në konsideratë një marzh, i cili mbulon kostot e shoqërisë;

b) Të njoftojë në mënyrë periodike, sipas përcaktimit të Bordit, çmimet tavan, të cilat publikohen në Qendrën e Botimeve Zyrtare dhe në një seksion të veçantë në faqen zyrtare të ministrisë përgjegjëse për hidrokarburet. Vendimet e marra nga Bordi i fillojnë efektet ditën pasardhëse ose sipas përcaktimit të vendimit të Bordit;

c) Të vendosë masën administrative, sipas shkronjës “c”, të nenit 21/6, të këtij kreu, që duhet të ndërmerren ndaj shoqërive në rast shkeljeje të parashikimeve të këtij kreu;

ç) Çdo kompetencë tjetër që vlerësohet e nevojshme në bazë të këtij kreu.

Neni 21/4

Strukturat për monitorimin e zbatimit të vendimeve të Bordit

Çmimet e caktuara me vendim të Bordit janë të detyrueshme të zbatohen nga të gjitha shoqëritë, sipas këtij kreu, dhe zbatimi i tyre monitorohet nga Drejtoria e Përgjithshme e Tatimeve, nëpërmjet verifikimit të faturave të lëshuara nga shoqëritë gjatë periudhës së masave të veçanta dhe nga Inspektorati Shtetëror i Mbikëqyrjes së Tregut, që vepron kryesisht nëpërmjet kontrolleve ose ankesave nga konsumatorët/qytetarët. Sipas rastit, Bordi mund të urdhërojë një nga strukturat e parashikuara në këtë nen për të kryer verifikime të thelluara në terren.

Neni 21/5

Metodologjia e llogaritjes së çmimit

Bordi cakton çdo javë ose kur e vlerëson të nevojshme, në diskrecion të tij, çmimin tavan për shitjen për gazoilin, benzinën dhe gazin e lëngshëm të naftës, sipas metodologjisë së mëposhtme:

a) Çmimi i shpallur nga bursa në Platts i një dite më parë nga mbledhja e Bordit, në kushtet CIF Med, për gazoilin, e standardit SSH EN 590 2018, benzinën e standardit SSH EN 228 2018 dhe gazin e lëngshëm të naftës përkatësisht propan, butan dhe përzierjen e tyre;

b) Çmimit të përcaktuar në shkronjën “a”, të këtij neni, i shtohet një vlerë premio prej 20 USD/ton;

c) Për shoqëritë e tregtimit me shumicë lejohet një shtesë jo më shumë se 1 % mbi çmimin e përlllogaritur, sipas shkronjave “a” dhe “b”, të këtij neni, në të cilin aplikohen edhe taksat e tarifave, sipas legjislacionit në fuqi;

ç) Për shoqëritë e tregtimit me pakicë lejohet një shtesë jo më shumë se 5% mbi çmimin e përlllogaritur, sipas shkronjave “a” dhe “b”, të këtij neni, në të cilin aplikohen edhe taksat e tarifave, sipas legjislacionit në fuqi.

Neni 21/6

Masat e veçanta administrative

Në rast të mosrespektimit të çmimit tavan përkatës, të vendosur nga Bordi, zbatohen sanksionet e mëposhtme:

a) Shoqëritë e tregtimit me shumicë të produkteve të naftës dhe gazit dënohen me gjobë, në masën 10 (dhjetë) milionë lekë;

b) Shoqëritë e tregtimit me pakicë të produkteve të naftës dhe gazit, të cilat nuk respektojnë çmimin tavan përkatës të vendosur nga Bordi, dënohen me gjobë, në masën 2 (dy) milionë lekë;

c) Në rast përsëritjeje, masave të mësipërme, të përcaktuara në shkronjat “a” dhe “b”, të këtij neni, i shtohet edhe heqja e licencës së tregtimit.

Neni 21/7

Masat me karakter detyrues

1. Të gjitha shoqëritë, që tregtojnë me shumicë produktet dhe nënproduktet e naftës dhe gazit, janë të detyruara të marrin masa për mbajtjen e rezervave përkatëse, sipas përcaktimeve në legjislacionin në fuqi, dhe të ofrojnë këtë shërbim të pandërprerë, në përputhje me vendimet e Bordit.

2. Të gjitha shoqëritë, që tregtojnë me pakicë produktet dhe nënproduktet e naftës dhe gazit, janë të detyruara të marrin të gjitha masat e nevojshme për të siguruar furnizimin e pandërprerë të konsumatorit/qytetarit, në përputhje me vendimet e Bordit.

3. Mosmarrja e masave nga shoqëritë private, sipas përcaktimeve në pikat 1 dhe 2, të këtij neni, dënohet sipas legjislacionit të fushës dhe këto shoqëri përjashtohen nga procedurat e prokurimit publik për një periudhë 3-vjeçare nga Agjencia e Prokurimit Publik.

4. “Albpetrol”, sh.a. me qëllim përmirësimin e situatës me furnizim të hidrokarbureve, ka të drejtë të hyjë në marrëveshje direkte me shoqëri private ose publike.

Neni 21/8

Organet kompetente për dhënien e masave administrative

1. Të drejtën e dhënies së masave administrative me gjobë, sipas përcaktimeve të nenit 26/1, të këtij kreu, e ka Inspektorati Shtetëror i Mbikëqyrjes së Tregut.

2. Shkeljet e konstatuara nga Drejtoria e Përgjithshme e Tatimeve, që lidhen me masë administrative me gjobë, sipas përcaktimit të nenit 21/6, të këtij kreu, i dërgohen brenda 24 (njëzet e katër) orëve Inspektoratit Shtetëror të Mbikëqyrjes së Tregut, i cili vepron, brenda 5

(pesë) ditëve me marrjen e masës përkatëse, të propozuar nga Drejtoria e Përgjithshme e Tatimeve.

3. Shkeljet e konstatuara nga Drejtoria e Përgjithshme e Tatimeve dhe Inspektorati Shtetëror i Mbikëqyrjes së Tregut, që lidhen me masën administrative “heqje licence të tregtimit”, i dërgohen brenda 48 (dyzet e tetë) orëve Bordit.

4. Me marrjen e kërkesës sipas pikës 3, të këtij neni, Bordi merr vendim lidhur me masën administrative “heqje licence të tregtimit”. Vendimi i Bordit i dërgohet për ekzekutim dhe fillimin e procedurës për heqjen e licencës organit kompetent. Akti administrativ i heqjes së licencës merret nga organi kompetent brenda 30 (tridhjetë) ditëve nga data e konstatimit të shkeljes.

5. Gjjobat e dhëna, sipas këtij kreu, përbëjnë titull ekzekutiv dhe modeli i tyre përcaktohet nga Inspektorati Shtetëror i Mbikëqyrjes së Tregut.

6. Gjjobat e mbledhura, sipas këtij kreu, derdhen 100% në buxhetin e shtetit.

7. Shqyrtimi dhe dhënia e masave administrative bëhen në përputhje me parashikimet e Kodit të Procedurave Administrative.

Neni 21/9

Vendimmarrja nga Bordi

Mbledhjet e Bordit, në cilësinë e organit kolegjal gjatë kohëzgjatjes së gjendjes së masave të veçanta, realizohet edhe *on-line*, nëpërmjet mjeteve të komunikimit elektronik/telepunës.

Neni 21/10

Kohëzgjatja dhe zbatimi

1. Parashikimet e këtij kreu zbatohen për atë kohë sa zgjat periudha e situatës së veçantë.

2. Zbatimi i parashikimeve të këtij kreu fillon me shpalljen e situatës së veçantë me vendim të Këshillit të Ministrave. Përfundimi i situatës së veçantë dhe i zbatimit të parashikimeve të këtij kreu përcaktohet me vendim të Bordit.

3. Në çdo rast, ky kre nuk përjashton aplikimin e legjislacionit në fuqi për parandalimin dhe luftimin e sëmundjeve infektive apo akteve të tjera ligjore, për atë kohë sa nuk janë në kundërshtim me dispozitat e këtij kreu.

Neni 21/11

Ankimi ndaj masave administrative

Masat administrative me gjobë, të vendosura sipas këtij kreu, ankimohen sipas parashikimeve të Kodit të Procedurave Administrative, ndërsa masat administrative me heqje licence të tregtimit ankimohen në gjykatën kompetente për shqyrtimin e mosmarrëveshjeve administrative, në përputhje me legjislacionin në fuqi.”.

Neni 2

Dispozitë kalimtare

Me hyrjen në fuqi të këtij akti normativ shpallet edhe situata e veçantë, në kuptim të këtij kreu, dhe fillojnë të zbatohen masat me karakter të veçantë, si pasojë e situatës emergjente të tregut hidrokarbur.

Neni 3
Hyrja në fuqi

Ky akt normativ hyn në fuqi menjëherë dhe botohet në Fletoren Zyrtare.

KRYEMINISTËR
Edi Rama

Botuar në Fletoren Zyrtare Nr. 40, datë 14.03.2022